

壽  
樂  
廬  
儀  
禮  
大  
固

儀禮彙固卷三

壽櫟廬叢書之一

名山吳之英典

士相見禮第三篇 士既冠出見士夫以摯因推論見禮題  
曰相見五禮屬賓兩戴記劉錄鄭目皆第三篇

士相見之禮摯冬用雉夏用牯左頭奉之曰某也願見無由  
達某子以命命某見 摯持初見持物將敬天子鬯諸侯圭  
卿羔大夫雁士用雉取其文冬取鮮標正名牯腊夏用冬  
所豫無由達年德相遠某子尊者賢者姓稱以相接標奉  
教君子以命述其賢能今文頭爲脰

主人對曰某子命某見吾子有辱請吾子之就家也某將走  
見 某子目賓所因某自名命見託爲謝有猶見也鮮先施

稱辱走見趨見今文無走

賓對曰某不足以辱命請終賜見主人對曰某不敢爲儀固請吾子之就家也某將走見命據走見見賢爲榮故稱賜再請言終以得見爲終儀文再請曰固今文不敢爲非敢古文云固以請也

賓對曰某不敢爲儀固以請主人對曰某也固辭不得命將走見聞吾子稱摯敢辭摯將走見將疾走出見辟慢賓聞賓所告稱猶奉古文云某將走見

賓對曰某不以摯不敢見主人對曰某不足以習禮敢固辭不以摯猶言不以禮見賢而不以禮辱也習肄謂賓善於禮將有與肄之某卽不足

賓對曰某也不依於摯不敢見固以請主人對曰某也固辭不得命敢不敬從 禮猶體故云依凡四辭者辭摯與辭見異節今文無也

出迎於門外再拜賓答再拜主人揖入門右賓奉摯入門左主人再拜受賓再拜送摯出 門外寢門外奉摯將投入門左東面主人再拜受西面出者摯行則禮達主人不送主人請見賓反見退主人送於門外再拜 請見請入見知所以來見之意未盡反見則升堂從燕坐節以同爵得展情

主人復見之以其摯曰臯者吾子辱使某見請還摯於將命者主人對曰某也既得見矣敢辭 以其摯標非更端臯往

使某見辟來見請還將命貨物事不必聞辭者所依以見  
非爲貨也今文無也

賓對曰某也非敢求見請還摯於將命者主人對曰某也既  
得見矣敢固辭 嫌託還摯求見故直云非敢既見無取得  
直故辭之固今文通無也

賓對曰某不敢以聞固以請於將命者主人對曰某也固辭  
不得命敢不從 雖知主人賤摯已無受禮聞之終以拘隘  
謝故固請將命者

賓奉摯入主人再拜受賓再拜送摯出主人送於門外再拜  
入入大門主人不出嫌迎受其摯卽拜送非爲來見不  
敢請見

士見於大夫終辭其摯於其入也一拜其辱也賓退送再拜終辭減請見復見節入而后拜辱主人不出迎摯者納賓揖讓升一拜主人尊賓退中容侍坐節主人不出故爲自退文送門內送再拜不盈乎尊

若嘗爲臣者則禮辭其摯曰某也辭不得命不敢固辭賓入奠摯再拜主人答一拜賓出臣家臣言若標上節非臣言嘗爲標今升於公或仕他家禮辭變終辭入不拜辱嫌違禮意奠摯再拜循臣道答一拜舊主餘尊賓出主人送於門內

使摯者還其摯於門外曰某也使某還摯賓對曰某也旣得見矣敢辭禮辭故還摯於門外不還於其家直稱還摯達

而已不爲文。

擯者對曰某也。命某某非敢爲儀也。敢以請賓。對曰某也。夫子之賤私不足以踐禮。敢固辭。某非爲儀。據主人饌。稱夫子至尊。家臣曰私別於公。踐及。

擯者對曰某也。使某不敢爲儀也。固以請賓。對曰某固辭不得。命敢不從。再拜受。再拜北面受。東面。主人不答拜。賓去。擯者告主人入。

下大夫相見以雁。飾之以布。維之以索。如執雉。雁不再匹。取有守。露執嫌質。故飾布。采布覆垂。維周束。草繩曰索。以約布。結於足。如執雉。奉左頭。

上大夫相見以羔。飾之以布。四維之。結於面左頭。如麇。執之。

如士相見之禮 羔取馴良四四足維之宜執結締羔面容  
結面結不礙手左頭本如執雉欲起執麇同麇麋子獸人  
冬獻狼夏獻麇執有成法如士相見兼下上大夫敵則同  
始見於君執摯至下容彌蹙 篇題士非士則目不目者皆  
士也大夫雖初升不名始見至下委佩提之局縮曰蹙彌  
蹙起見尊長有蹙容

庶人見於君不爲容進退走 庶人無見君禮此謂在官庶  
人因事而見非與禮故不爲容徐行不及事故進走已事  
而翔步妨于禮故退亦走

士大夫則奠摯再拜稽首君答一拜 大夫不別上下卿與  
大夫同謂若賢能特命及異邦大夫初摯君兼士士如大



夫則者繼庶人詞起庶人無奠摯節無拜節徒見而已。

若他邦之人則使擯者還其摯曰寡君使某還摯賓對曰君不有其外臣臣不敢辭再拜稽首受人士大夫謂因事過竟稱摯擯辭略亦君臣不辭而受不敢貳君。

凡燕見於君必辯君之南面若不得則正方不疑君君在堂升見無方階辯君所在凡言非對也妥而後傳言燕間辯便使君南面鄉己不得者事勢有違君不拘鄉正直北面方南方謂立位疑儼不儼君衰鄉豫位謂在門若庭在堂不必升見此標升見法方正無正階可阼可西辯君所在近君而升凡言目陳事對者不埃妥故斷而非之妥安傳進未妥或有異事異慮心不屬耳古文妥爲綏。

與君言言使臣與大人言言事君與老者言言使弟子與幼  
者言言孝弟于父兄與眾言言忠信慈祥與居官者言言忠  
信 廣論士燕見立言法使臣言用禮事君言用忠大人該  
公卿大夫老致仕傳家者使弟子言習外事幼未冠者孝  
弟言修內則眾同爵者忠信言善交慈祥言惠下居官者  
謂府史胥徒忠信言奉上。

凡與大人言始視面中視抱卒視面毋改眾皆若是 大人  
大夫以上始見察形色發言耑故視面言至中決事理疏  
委曲故視抱言既卒審聽否施勸救故仍視面毋改謂更  
言他事亦守始中卒三節眾凡臣屬嫌專爲士法故云皆  
若是古文本毋通作無今文眾爲終。

若父則遊目毋上於面毋下於帶 由君及父故若則者標  
眾有父皆若是遊目視及兩旁容有所指擬上面嫌忤下  
帶嫌情毋者約文於敬以補恩之質言無所占斷合於道  
特以視抱爲正今文父皆爲甫

若不言立則視足坐則視膝 不言則敬侍因爲之節視足  
俟行視膝俟起可以下帶仍不得上面所謂梓木晉晉然  
類者子道也

凡侍坐於君子君子欠伸問日之蚤晏以食具告改居則請  
退可也 君子鄉先生謂師長屬君父其侍三本法欠口氣  
出生於腎鬱則舒之伸取自直因屈久坐問日蚤晏或有  
他營告食具侍者知節改居近厭常處請退助養息言則

弟子職言可容留讎古文伸作信今文蚤作早

夜侍坐問夜膳葷請退可也 問夜欲知漏刻寢有節葷薑桂屬進食曰膳膳葷欲啟神明則既倦矣爲請業請益君子不肯辭故古文葷作熏

若君賜之食則君祭先飯徧嘗膳飲而俟君命之食然後食燕見賜食故云若祭祭薦俎君爲主故祭先飯標不祭膳善以君饌嘉爲名徧嘗膳知旨否飲因嘗自醕俟俟卒祭君命食知爲已嘗然后食待命乃卒

若有將食者則俟君之食然後食 將奉將食膳夫有則將食者先嘗本有言若或以有客命退君食卒祭後則俟無飯膳飲節然后食不需命

禮記集說卷三  
若君賜之爵則下席再拜稽首受爵升席祭卒爵而俟君卒爵然後授虛爵 若謂兼飲賜爵在君飲後有餘腴下席拜席西北面升席由君左受于君故祭卒爵不拜以待食簡授虛爵坐授將食者凡侍飲得賜不過三爵今文作若賜之爵

退坐取屨隱辟而后屨君爲之興則曰君無爲興臣不敢辭君若降送之則不敢顧辭遂出 退降說屨升故退取坐納屨儀隱曲辟偏屨不上堂解不當階則階側西堂爲屨地君爲興若祭與降時言不敢辭則深辭據燕君無降送禮故若降送降阼階西面立不敢顧辭重勞君舉庭內節故曰遂出

大夫則辭退下比及門三辭言則標異于士退謂降席下謂降階亦承降送言比次比及門送大夫于門併退下門爲三三辭後亦不顧

若先生異爵者請見之則辭辭不得命則曰某無以見辭不得命將走見先見之先生君子異爵卿大夫請見尊者不摯醴稱當就見不得命謂固請無以猶言未依於摯將走見因迫於請皆摯辭先見出門左北面再拜乃揖入

非以君命使則不稱寡大夫士則曰寡君之老寡大夫公士摯辭私事使私人稱外臣某士公士曰亦奉使辭老家宰稱私事曰陪臣某

凡執幣者不趨容彌蹙以爲儀幣謂束帛若錦執謂授使

若覲時六幣玉馬皮圭璧帛馬皮皆庭實他見法下出玉知據六幣之帛耳無執趨以爲敬有執不以爲文今文無容

執王者則唯舒武舉前曳踵玉兼諸瑞執佐傳纁藉或時得專禮舒徐武步前前趾引而屬之曰曳足後曰踵舉舒武法爲慎寶器則唯標無異步今文無者古文曳作𡗗

凡自稱於君士大夫則曰下臣宅者在邦則曰市井之臣在野則曰草茅之臣庶人則曰刺草之臣他國之人則曰外臣因見君別稱號下者事上辭不曰卑賤有所辟也宅者不受田則僦居與土箸同近井爲市八家爲井在邦屋居故曰市草莽茅白菅在野鄉居故曰草茅庶人受田者刺

殺殺草糞田以利種也他國人嘗至不宅非純臣故曰外  
今文宅爲託古文茅作苗

弟子傳守中校勘

壽櫟廬第二子吳 銑再校



儀禮喪固卷三終

儀禮夾固卷四

壽櫟廬叢書之一

名山吳之英典

鄉飲酒禮第四篇 鄉大夫三年大均選賢能獻王飲以觀禮射以觀德禮閑德脩然后待命焉侯國選以獻君用之爲本國士夫貢之爲王朝卿士射需續行飲爲首禮諸侯再選天子會選禮意略同而鄉飲首選爲重五禮屬嘉大戴第十小戴第四劉錄鄭目同第四篇

鄉飲酒之禮主人就先生而謀賓介大司徒以鄉三物教萬民一曰六德二曰六行三曰六藝六鄉大夫以正月吉受法退頒鄉吏使各教所治三年大比考其德行道藝而興賢者能者以禮禮賓之獻書于王登于天府內史貳之

侯同國法賓之故飲之酒主人鄉大夫先生教士者鄉有  
塾子弟受學焉致仕之大夫爲大師教於左士爲少師教  
於右習知賢能故就謀賢能爲賓次爲介又其次爲眾賓  
主人戒賓賓拜辱主人答拜乃請賓賓禮辭許主人再拜賓  
答拜主人退賓拜辱介亦如之稱主人容黨正飲酒同鄉  
法謀定故往戒賓聞戒知與選故出拜降尊就卑曰辱乃  
請因戒讓爲美德故禮辭賢不忘國故卽許再言拜辱變  
送文與迎拜起爲屬民深謝尊長至介亦如者禮質不容  
更減眾賓則使有司戒

乃席賓主人介眾賓之席皆不屬焉乃席者戒歸命布席  
賓牖間南面席主人阼階西面席介賓西南東面眾賓席

直介西相亞曰屬不屬離之又與介異上貴士所以厚期眾賓

尊兩壺於房戶間斯禁有玄酒在西設篚於禁南東肆加二勺於兩壺斯離離禁壺各有禁禁承壺名禁爲酒戒有玄酒尊賓篚所以盛爵觶

設洗於阼階東南南北以堂深東西當東榮水在洗東篚在洗西南肆篚盛洗具兼爲奠爵設亦實觶

羹定烹肉假羹名成謂之定凡般非牢不陳鼎俎略言羹定爲速賓節

主人速賓賓拜辱主人答拜還賓拜辱介亦如之賓及眾賓皆從之速宿欲賓速至故名還退主人拜稱速辭賓又拜

爲俠主人速賓則有司速眾賓主人速介眾賓集賓門介  
既拜辱則從賓而后眾賓從屬速介不得言介從賓帥介  
從主人亦不得言介及眾賓從賓

主人一相迎於門外再拜賓賓答拜拜介介答拜揖眾賓  
相主人有司以相禮名賓介從主人無迎者故一相代主  
人再拜賓代迎則代拜賓答拜東面主人辟門左北面拜  
介如拜賓介答如賓揖眾賓三揖旅之厯敘代迎不異禮  
揖眾賓則相入

主人揖先入賓厭介入門左介厭眾賓入眾賓皆入門左北  
上相已成拜故主人揖賓繼相入言先對賓厭牽引意似  
揖而異儀賓介承主人意相厭猶相讓也今文厭皆作揖

又曰眾賓皆入左。

主人與賓三揖。至於階三讓。主人升賓升。主人阼階上當楣北面再拜賓西階上當楣北面答拜。楣屋樨齊謂之檐。楚謂之栝。秦謂之楊聯。

主人坐取爵於篚降洗賓降主人坐奠爵於階前辭賓對篚禁南篚凡地上物宜坐取以申敬洗洗爵洗在阼階東南故降賓知爲己洗故從降不宜執爵致辭故奠因奠故坐凡奠皆坐屈身亦非敬也於階前發賓降位辭不敢當降對稱不敢不降。

主人坐取爵興適洗南面坐奠爵於篚下盥洗賓進東北面辭洗主人坐奠爵於篚興對賓復位當西序東面南面主

人適洗宜奠爵篚下未遽洗盥洗盥面洗手先自潔繼當洗爵故賓進東北面衰鄉主人辭洗謝致潔敬主人坐奠爵發盥洗後坐取爵興於篚易奠所標將洗對西南面稱不敢不洗堂上東西牆謂之序當西序東面稱復起對辭降後退爲位今文南面坐無奠

主人坐取爵沃洗者西北面卒洗主人一揖一讓升賓拜洗主人坐奠爵遂拜沃漉水沃洗者有司西北面主人左少前賓拜洗盛主人洗事遂拜因奠不更興

降盥賓降主人辭賓對復位當西序卒盥揖讓升賓西階上疑立盥濯手嫌拜污不宜酌賓降爲加敬不敢安辭以盥爲潔已對以爲已重煩復升無拜節故疑立

主人坐取爵實之賓之席前西北面獻賓賓西階上拜主人少退賓進受爵以復位主人阼階上拜送爵賓少退 酒器實一升曰爵西北面視賓就所筵西階上拜不敢受於筵主人不得答故少退辟拜進受東南面復位待薦事賓少退辟送拜

薦脯醢賓升席自西方乃設折俎主人阼階東疑立 薦有司進饌賓席自西方升由席末不背主人賓俎脊脅肩肺折體解而節折乃設俎賓升貴俎阼階東辟禮位疑立待賓祭

賓坐左執爵祭脯醢奠爵於薦西興右手取肺卻左手執本坐弗繚右絕末以祭尙左手齊之興加於俎坐挽手遂祭酒



左執爵右當祭豆奠爵將興於薦西將舉右手取順體所宜卻退右斜上而左氏本祭肺首不盡離坐爲弗繚大祝辨九祭一曰命祭二曰衍祭三曰炮祭四曰周祭五曰振祭六曰擣祭七曰絕祭八曰繚祭九曰共祭弗繚卽繚祭制祭長鄉外曰弗周轉曰繚絕爪斷之末繚餘絕末稱右起弗繚用左以祭供豆間此實八祭而兼七祭也尙左手左執之右當取臍臍之標已嘗加俎成俎實興取仍興加貴肺也先豆後俎祭次依薦設次挽振挽手以帨爲舉祭污因挽手坐因坐祭酒故曰遂後祭酒飲禮以酒成古文挽作說

興席末坐啐酒降席坐奠爵拜告旨執爵興主人阼階上答

拜賓西階上北面坐卒爵興坐奠爵遂拜執爵興主人阼階上答拜 席末席右將啐酒變位爲敬坐答主人意將飲先啐示有漸也降席直席西南拜欲離席奠爵於北旨甘旣啐知味故告旨接主人歡執爵興將爲卒爵變位西階上北面卒爵儼受獻於此成飲於此興表卒爵遂拜因奠旣爵終獻事執爵興將酢主人

賓降洗主人降賓坐奠爵興辭主人對賓坐取爵適洗南北面主人阼階東南面辭洗賓坐奠爵於篚興對主人復阼階東西面賓東北面盥坐取爵卒洗揖讓如初升主人拜洗賓答拜興降盥如主人禮 賓降洗爲酢主人知爲已洗故降坐奠爵亦於階前辭謝其降對以禮須陪適洗南順其位

北面鄉主人主人南面鄉賓卽辭洗變賓盥後儀先事尤  
敬賓奠不先於篚下亦簡其儀對爲已飲當更潔言復起  
先降位東北面微衰偏左立盥卒洗沃洗者西北面升賓  
先升。

賓實爵主人之席前東南面酢主人主人阼階上拜賓少退  
主人進受爵復位賓西階上拜送爵薦脯醢主人升席自北  
方設折俎祭如賓禮不告旨 賓實爵藉物答禮酢通醕報  
獻名阼階上拜不敢受於席賓少退以執爵辟進受西北  
面賓拜送主人亦少退升自北方亦由席末主人俎脊脅  
臂肺不告旨不當自甘謂啐酒後。

自席前適阼階上北面坐卒爵興坐奠爵遂拜執爵興賓西

階上答拜主人坐奠爵於序端阼階上北面再拜崇酒賓西  
階上答拜 啐時已降坐席末故自席前阼階上北面坐卒  
爵儼成酢於此執爵與標卒不降奠將獻介奠序尚志獻  
賓之爵崇重養賓轉用勞賓謝其綴故拜以爲辭。

主人坐取觶於筐降洗賓降主人辭降賓不辭洗立當西序  
東面卒洗揖讓升賓西階上疑立 主人坐筐南北面取觶  
爲酬殺於獻亦降洗自潔所以事賓賓降不安於位辭降  
亦奠觶賓亦對賓不辭洗欲其洗以自養不盥而卒洗簡  
於獻升亦主人先疑立不拜。

主人實觶酬賓阼階上北面坐奠觶遂拜執觶興賓西階上  
答拜坐祭遂飲卒觶興坐奠觶遂拜執觶興賓西階上答拜

卽云酬禮爲酬自飲亦酬降階上北面坐奠將先飲道賓不就賓階尊賓遂拜若此解徑由賓得然賓西階答拜成主人意坐祭凡飲當祭遂飲不啐

主人降洗賓降辭如獻禮升不拜洗賓西階上立 酬賓當更潔故降洗賓因爲己洗故陪降辭爲重煩賓賓對以重煩主人如獻禮賓辭洗主人對不拜洗殺於獻爲主人自洗時已不拜仍之視滅立亦疑

主人實解賓之席前北面賓西階上拜主人少退卒拜進坐奠解於薦西賓辭坐取解復位主人阼階上拜送賓北面坐奠解於薦東復位 席前北面同於獻尊賓西階上拜如獻之受卒拜俟賓卒爲進節進復席前位坐奠非正爵不親

授於薦西欲其舉辭謝奠位坐取觶將易奠復位辟送拜北面坐不當升薦東席左奠薦東酬酒不得遽舉復位待禮。

主人揖降賓降立於階西當序東面揖降爲將升介賓不自降入門聽命於主人不敢側降故陪降當序東面爲介標降位。

主人以介揖讓升拜如賓禮主人坐取爵於東序端降洗介降主人辭降介辭洗如賓禮升不拜洗介西階上立取爵東序端受賓酢所奠不易爵標介因賓得獻升不拜洗比賓受酬。

主人實爵介之席前西南面獻介介西階上北面拜主人少

退介進北面受爵復位主人介右北面拜送爵介少退主人  
立於西階東西南面外袞鄉介主人少伸尊於介北面受  
爵不敢正對主人介右北面拜送因西階爲位禮以遠別  
近則殺於敬立西階東又不變拜位就介爲降尊也今文  
無北面。

薦脯醢介升席自北方設折俎祭如賓禮不啗肺不啐酒不  
告自自南方降席北面坐卒爵興坐奠爵遂拜執爵興主人  
介右答拜自北方側升由席右辟賓升方介俎脊脅肫膈  
肺不啗肺唯祭肺不啐酒不坐席末不告旨因未啐亦不  
爲己旨均降於賓之受獻自南方降由席左取別於賓主  
人介右答拜爲獻眾賓張法。

介降洗主人復降階辭如初卒洗主人盥介揖讓升授主人爵於兩楹之間介西階上立 降洗爲酢復降階降當就主階辭兼介辭降主人辭洗初謂賓酢時卒洗介退俟西階下東面主人盥將代介實爵介揖讓升介先升授主人爵請自實主人之尊賓與共已不得僭於兩楹間仍賓也不當過卑西階上北面立既未執爵不得適主人席前

主人實爵酢於西階上介右坐奠爵遂拜執爵興介答拜主人坐祭遂飲卒爵興坐奠爵遂拜執爵興介答拜主人坐奠爵於西楹南介右再拜崇酒介答拜 實爵伸介意於西階上就介爲酢坐奠爵不容授使酢已遂拜如親受酢介答拜變拜送文標不專爵奠西楹南當獻衆賓近賓爲位再



拜崇酒成介之酢

主人復阼階揖降介降立於賓南 復阼階受酢畢揖降將  
獻眾賓先揖介乃從降不酬介羸於酢立賓南爲眾賓表  
主人西南面三拜眾賓眾賓皆答一拜主人揖升坐取爵於  
西楹下降洗升實爵於西階上獻眾賓眾賓之長升拜受者  
三人主人拜送坐祭立飲不拜既爵授主人爵降復位 西  
南面裒鄉眾賓主人益尊三拜旅之皆答一拜不備禮因  
主人之殺揖升揖眾賓實主人特升取爵西楹下標仍襲  
賓爵所以厚期眾賓降洗眾賓長一人辭洗於西階上獻  
降於介稱長皆待舉之人德鈞則齒三人爲眾故敘拜進  
受以爲節拜送在賓長右立飲立卒爵不拜既爵殺其文

授立授不敢酢尤降於介降待主人奠爵揖降立介南言復標仍門左西位北上。

眾賓獻則不拜受爵坐祭立飲每一人獻則薦諸其席眾賓辯有脯醢主人以爵降奠於筐眾賓獻謂受獻主人降洗揖升實獻如長不拜受爵又殺於三人每獻則薦目薦節一人綜賓長以下故每其席繼賓而西辯猶通辯有脯醢箸無折俎以爵降奠在揖卒受者降後標獻賓畢今文辯爲徧。

揖讓升賓厭介升介厭眾賓升眾賓序升卽席揖讓升奠爵還直阼階西面一揖一讓主人先升序升卽席主人乃卽席。

一人洗升舉觶於賓賓觶西階上坐奠觶遂拜執觶興賓席末答拜坐祭遂飲卒觶興坐奠觶遂拜執觶興賓答拜一人主人吏洗取下筐觶舉觶勸賓酒要獻禮之成知爲賓贊以時相實觶進賓西階坐奠退左還北面遂拜當先自飲略仿酬儀。

降洗升實觶立於西階上賓拜進坐奠觶於薦西賓辭坐受以興舉觶者西階上拜送賓坐奠觶於其所舉觶者降降洗爲自飲更潔立西階上左還北面辟賓拜賓拜席末南面進待賓成拜而進非正爵故坐奠辭謝加禮坐取而言受若親受興示受觶坐奠待其成拜其所前奠位將先取酬主人不從酬酒薦東位降降而東此時遵者諸公大夫

當入

設席於堂廉東上工四人二瑟瑟先相者二人皆左何瑟後  
首拊越內弦右手相 設席爲工將入堂邊謂之廉目西階  
上東上順主樂賓工樂人燕樂常數天子八諸侯六大夫  
四士二四人大夫爲主人宓戲作瑟五十弦黃帝破爲二  
十五弦二瑟二人歌瑟先歌者後工用瞽取專聽於耳相  
者道工二人相瑟歌隨相何荷儋名後首左瑟尾授時順  
右鼓宜越瑟底拊持內弦瑟面內鄉妨誤觸右手相在工  
左

樂正先升立於西階東工入升自西階北面坐相者東面坐  
遂授瑟乃降 樂正胥也樂師之屬有大胥小胥皆總樂事

故先升立西階東爲工表位工北面直樂正東坐於樂事  
宜東面坐因相用右手工當坐因相授故曰遂歌者從立  
工歌鹿鳴四牡皇皇者華歌以唱瑟貴人聲不題瑟鹿鳴  
燕臣及賓四牡勞使臣來皇華禮命使臣起瑟卽弦此三  
雅

卒歌主人獻工工左瑟一人拜不與受爵主人阼階上拜送  
爵薦脯醢使人相祭工飲不拜旣爵授主人爵眾工則不拜  
受爵祭飲辯有脯醢不祭卒歌乃獻食其工工左主人右  
瑟一人謂長拜因坐瞽者不能責禮于長見禮意不與受  
爵主人坐授阼階上拜送專階特拜成主人尊薦脯醢直  
席北人前相入者使贊命相授薦祭飲立卒授爵主人進

受祭坐祭酒飲亦立卒辨有脯醢薦各遠其位辟樂位不祭無相略眾工

大師則爲之洗賓介降主人辭降工不辭洗 大師掌六律六同合陰陽之聲凡瞽矇正焉有大師或君命或受賜大師在則先工升爲之洗尊之不與眾工齒於此出大師不必有右則獻在眾工前賓介降知爲己禮工若代大師謝主人然工謂大師未降而言不辭洗者嫌賓介可代辭起大師固不拜洗卒洗以賓介升揖卽席乃實爵如獻瑟長儀特舉大師樂正獻同眾工

笙入堂下磬南北面立樂南陔白華華黍 笙生也女媧所作以篴貫匏篴中納簧篴口飾金十三篴宮篴左吹笙則

簣鼓葢竹匏合音以象大族之氣入以卒獻瑟工爲節入  
不相略堂下樂磬磬也石音毋句氏所作象夷則之氣磬  
南懸在北凡懸有鼓鐘鐃磬鼗鼗諸器但有磬鄉飲不  
取備立堂下皆立工樂謂以笙叶律南陔孝子相戒以養  
白華孝子之潔白華黍時和年豐宜黍稷三篇名舊列小  
雅皆有詎無辭凡笙皆寫意調律無歌詩

主人獻之於西階上一人拜盡階不升堂受爵主人拜送爵  
階前坐祭立飲不拜既爵升授主人爵獻于西階上直西  
廉一人笙長三笙一和亦四人拜拜受盡階不升堂樂位  
本在下受爵立受主人拜送於獻位北面坐祭祭薦與酒  
亦使人相升授優待主人

眾笙則不拜受爵坐祭立飲辯有脯醢不祭 雖不拜亦盡  
階既升投爵則徹薦於下

乃間歌魚麗笙由庚歌南有嘉魚笙崇丘歌南山有臺笙由  
儀 間中有辭與無辭代作一歌一笙相闕也六篇名列小  
雅魚麗美萬物盛多能備禮由庚萬物得由其道南有嘉  
魚樂與賢崇丘萬物得極其高大南山有臺下報上由儀  
萬物之生各得其宜由庚崇丘由儀皆笙樂有題詠無詩  
辭非亡也

乃合樂周南關雎葛覃卷耳召南鵲巢采芣采蘋 有辭有  
聲歌與樂相和曰合六篇皆風詩王者之風繫之周公化  
自北而南故曰周南關雎后妃之德葛覃后妃之本卷耳



后妃之志諸侯之風先王所教繫之召公故曰召南鵲巢  
夫人之德采蘋夫人不失職采蘋大夫妻能循法度二南  
正始之道王化之基故用之鄉人用之邦國也

工告於樂正曰正歌備樂正告於賓乃降 樂正掌比樂工  
故工畢樂以告有大師則告大師正歌備謂一歌再笙三  
間四合燕饗通用四成異無算唯欲之錯取樂賓者主人  
意故告賓乃降逆降立直笙工東南西面

主人降席自南方側降作相爲司正司正禮辭許諾主人拜  
司正答拜主人升復席 自南方降由席首不欲疑賓降階  
非與賓介禮故側作興之相賓至時出迎者在阼階東西  
面司正監飲名將行酬卽以監飲爲相特作易名俾共識

之主人拜重其事升復席仍自南辟所職

司正洗解升自西階阼階上北面受命於主人主人曰請安於賓司正告於賓賓禮辭許司正告於主人主人阼階上再拜賓西階上答拜司正立於楹間以相拜皆揖復席 洗解取下筐解東面洗卽洗者升受命將因實受命主人作由主人請安於賓者立司正以防淫嫌逼賓唯禮可以安人故申意請安告賓述命禮辭愛己以德不當固辭許者答主人安己之厚告主人告賓許旣告宜進實解因主拜賓答不敢背經於楹間爲位遂以相拜名其實主爲大夫賓亦鄉賢拜無失節不容司正之過相也

司正實解降自西階階間北面坐奠解退共少立坐取解不

祭遂飲卒觶興坐奠觶遂拜執觶興盥洗北面坐奠觶於其所退立於觶南 階間東西中北面兼鄉賓黨主黨坐奠觶表其位退興退共拱手退共敬其職少立重其儀不祭本以視罰爵遂飲爲罰爵舉例盥奠爵先潔徒洗爵示有豫臨事則實所階間未有適罰不宜偏奠立觶南監飲事

賓北面坐取俎西之觶阼階上北面酬主人主人降席立於賓東賓坐奠觶遂拜執觶興主人答拜不祭立飲不拜卒觶不洗實觶東南面授主人主人阼階上拜賓少退主人受觶賓拜送於主人之西賓揖復席 俎西觶一人舉於賓者阼階上北面就酬於位賓東主位遂拜於主人西旅酬不祭始酬爲發例立飲不拜各兩拜畢酬卒觶不洗爲受酬者

亦不祭東南面授儼鄉席阼階上拜起先答拜位賓少退辟主人受觶西北面拜送於主人西起奠觶時拜位賓揖延主人復席主人揖賓自復辟酬介。

主人西階上酬介介降席自南方立於主人之西如賓酬主人之禮主人揖復席西階上酬介因賓酬旅介自南方降順席首不背主人主人揖延介就席介揖主人自復後酬皆如之。

司正升相旅曰某子受酬受酬者降席司正退立於序端東面受酬者自介右眾受酬者受自左拜興飲皆如賓酬主人之禮辯卒受者以觶降坐奠於篚司正降復位賓主行酬皆不待相故司正此時始升介將旅防賓眾有不閑者故

相相旅直介左北面某子賓長字酬次宜如獻次退立序  
端辟酬東面宜相受酬者賓長自介右辟司正退位兼得  
尊介比賓眾受酬者次長以下受自左旅例酬者爲主皆  
如賓酬主人禮位雖變節則同辯畢酬降卒受者揖酬者  
升席乃降坐奠於篚東面興升卽席司正位觶南北面不  
與旅故降復今文云眾受自左無受酬者

使二人舉觶於賓介洗升實觶於西階上皆坐奠觶遂拜執  
觶興賓介席末答拜皆坐祭遂飲卒觶興坐奠觶遂拜執觶  
興賓介席末答拜二人亦更舉觶賓介再發酬而賓介同  
舉禮殺不殊猶祭奉命不容慢

逆降洗升實觶皆立於西階上賓介皆拜皆進薦西奠之賓

辭坐取觶以興介則薦南奠之介坐受以興退皆拜送降賓介奠於其所 逆降舉介觶者先薦西奠賓右奠薦南亦介右起介席得東面介坐受變坐取文示降賓退反西階上降仍逆所前奠位再旅卽舉今文曰賓受奠無介

司正升自西階受命於主人主人曰請坐於賓賓辭以俎主人請徹俎賓許司正降階前命弟子俟徹俎 賓介奠觶不舉故司正升請命本坐而請欲賓安燕續旅司正還請故賓辭俎盛肴辭爲敬請徹因司正還告賓辭爲賓設須賓命賓許謝主人成其意降命堂上非司正出命之所階前表俟徹位弟子主黨執役者兼欲賓黨弟子見聞之

司正升立於序端賓降席北面主人降席阼階上北面介降

禮記集說卷四  
席西階上北面遵者降席席東南面 司正升則賓主降節  
升爲受賓俎立序端辟降徹賓降北面還鄉席宜坐取主  
人阼階北面不當鄉席背賓介西階北面不敢鄉席背主  
人因陪位遵者先生君子異稱幸來爲榮民之望也席在  
主人右故降席東南面皆爲位以俟畢降取俎時仍各坐  
鄉其席今文遵爲僎或爲全

賓取俎還授司正司正以降賓從之主人取俎還授弟子弟  
子以降自西階主人降自阼階介取俎還授弟子弟子以降  
介從之若有諸公大夫則使人受俎如賓禮眾賓皆降 還  
右還授司正司正進受東面尊賓不使弟子以降出授賓  
從者賓從降西階東面若勞其代已然主人取俎東面坐

還右還弟子進由左北面受降自西階起升自西階凡俎升降由西階外饗割烹別於內饌也降則以東主人降阼階陪賓爲位介取俎西面還如賓還弟子受俎北面以降出授介從者介從降立賓南諸公寄公或監國假名大夫國卿貳言若有來否不必人司正佐使司正使諸公俎如賓大夫如介受如賓禮還投降從降皆從俎不必相直以各降爲文諸公大夫言徹俎亦降席遵者言降席亦徹俎相起也眾賓無俎以陪禮將說屨亦從降立遵者南

說屨揖讓如初升坐乃羞無算爵無算樂燕坐不屨所以自舒其足如初如畢獻主人揖賓介與眾賓相厭升卽席羞猶膳假爲加饗加豆專稱羞不踰牲用博物品厚情文



言乃遲之禮不尙多味也。算計不計爵盡醉不計樂盡驩。今文說爲稅。

賓出奏陔主人送於門外再拜。賓出畢燕降階納屨出鍾師掌以鐘鼓奏九夏。王夏肆夏昭夏納夏章夏齊夏族夏祓夏騶夏舊說賓入奏納夏出奏祓夏陔卽祓聲之侈斂異不以樂納以送者非宿縣故奏樂正命賓及階而作出大門而闕送再拜拜賓兼送眾賓賓不顧主人亦歸。

賓若有違者諸公大夫則旣一人舉觶乃入席於賓東公三重大夫再重。賓對主人爲目若有不在戒速列不必備不必無旣一人舉觶正獻畢有酬尚言乃重爲節其間得容布席事入當以其等與數爲之席賓東誼在賓主間重加

席優尊者取溫厚三重葢蒲筵緇布純加萑席玄帛純加莞筵紛純再重蒲筵常緇布純加萑席尋不言尊者有爵視其秩無爵則蒲筵

公如大夫入主人降賓介降眾賓皆降復初位 大夫無入儀前敘遵者在諸公上舉中標同使下如大夫知上如遵者入有降節無諸公遵者大夫入卽如公入之降初位初厭入門左北上位

主人迎揖讓升公升如賓禮辭一席使一人去之大夫則如介禮有諸公則辭加席委於席端主人不徹無諸公則辭加席主人對不去加席 迎於門內據擯者告乃降揖讓升備入節公升如賓禮主人先拜至獻爵取於上筐辭謂旣薦

辭一席猶有加不欲多上於賓使贊者使一人弟子去以入房尊者從所欲殺大夫如介禮降於公獻襲公爵辭加席禮辭委猶積席端席西北主人不徹徹嫌因委失敬無諸公猶辭謝優己過賓辭而不委無所厭主人對以禮當重席對而不去成大夫尊公既奠酬降立賓南有尊者東面北上位從公大夫既酢降立公南

明日賓服鄉服以拜賜主人如賓服以拜辱鄉往也鄉服往日飲酒服拜賜謝致禮主人不出賓再拜退如賓服往拜拜辱鳴答傳擯辭賓亦不見今文曰如賓鄉服

主人釋服乃息司正無介不殺薦脯醢羞唯所有徵唯所欲以告於先生君子可也賓介不與鄉樂唯欲釋服去朝服

服玄尚息養。謂勞而飲之。無介。本故相爲賓。不殺。無俎。續  
事薦脯醢。內饗所具羞。庶羞品多饒餒。微速。唯所欲親。知  
得會。告請先生。嘗就謀。君子樂道養素。來皆爲遵者。不來  
於時。告之。優齒德。不以簡嬾嫌賓介。不與禮之餘。近可與  
故決之。鄉樂風詩。唯欲不局篇節。聲歌有宜。古文釋作舍  
與爲豫。

記鄉朝服而謀賓介。皆使能不宿戒。稱鄉。賅州黨朝服。  
玄冠。玄衣。白布裳。素鞵。白屨。能賢才。使先生命。主人請不  
宿戒。謀定。不筮。

蒲筵。緇布純。襄邊曰純。闇色爲文。主人賓介。眾賓筵同。  
主人不重陪賓。

尊綍羃賓至徹之 至至門徹弟子徹不待命徹卽降爲  
入不可參

其牲狗也烹於堂東北 狗叩也叩氣以守金畜禦無禮  
秋所食古者家畜皆用佐食狗以下牲不入牢小事用之  
不陳鼎內在簋曰烹堂東北東夾南壁內饗之外爓亦外  
饗之內爓

獻用爵其他用觶 爵容一升少爲敬他諸酬事解容三  
升大小中

薦脯五挺橫祭於其上出自左房 目薦制醢不可數約  
稱脯胸謂之脰五脰適邊祭制脯爲祭小切正方橫脰上  
別於脰出左房由北堂饌內饌

俎由東壁自西階升賓俎脊脅肩肺主人俎脊脅臂肺介  
俎脊脅肫膈肺肺皆離皆右體進腍由東壁烹於堂東  
北自西階升本外饗所職理別房薦辨賓主人介俎牲體  
起異載背呂謂之脊脊旁謂之脅一曰幹前膊謂之肩肩  
下股謂之臂後膊謂之肫肫下節謂之膈凡牲外七體脊  
脅肩臂肫膈肺膈肉不可別別以骨內七體心肝脾肺腎腸  
胃酌取爲制分配以升尊者俎前卑者俎後皆有肺時所  
尙皆有祭離不絕宜祭膾皆右體尙右腍肉理直俎腹理  
進腍橫俎今文膈作脰

以爵拜者不徒作以爵拜奠爵拜徒猶空作興謂奠爵  
拜者必執爵興此因主人獻答拜洗卽云降盥賓酢答拜

降盥如主人皆無執爵興文以爵不再洗而盥升坐取猶不徒作故概之。

坐卒爵者拜既爵立卒爵者不拜既爵爲獻酬概受皆拜既爵有拜不以坐卒立卒別之。

凡奠者於左將舉者於右據受酬觶舉觶左不順故不舉則奠右順手故將舉者奠。

眾賓之長一人辭洗如賓禮一人謂長辭洗由位進三人升拜受嫌堂下禮同一人辭則再洗二人不進立其位帥眾賓。

立者東面北上若有北面者則東上謂眾賓在介南者若有賓多凡異列則異上易於別識受獻則由北而南由

東而西。

樂正與立者皆薦以齒。樂正自升至降無獻節。言薦標得獻立者。堂上則歌工。堂下則笙工。鼓人。鐘師。磬師。故通曰。與薦以齒。則獻以齒。

凡舉爵三作而不徒爵。凡日獻事一爵三用之。受賓酢奠序。端受介酢。奠西楹南。辯獻眾賓。降奠。篚取有時。奠有等。不徒見爲一爵之用。工樂賓者。遵者。諸公大夫。陪賓者。非正獻。不與數也。

樂作大夫不入。樂作工入。席定。嫌自瀆。遵者。諸公如之。獻工與笙取爵於上。篚既獻奠於下。篚其笙則獻諸西階上。工歌工笙亦工。言笙嫖堂下。諸工取與奠如賓爵。著



工與笙獻爵同笙則西階上獻地異古文西階無上

磬階間縮雷北面鼓之階間磬縣位縮直雷承檐檢堂

前雷衡背衡爲縮北面鄉縣鼓擊古文縮爲蹙

主人介凡升席自北方降自南方主人介席皆南上皆  
升由席末降由席首起賓升降由席末眾賓席介西不屬  
賓得同上

司正既舉觶而薦諸其位獻不及司正職在自舉又明  
日當息既舉觶退立觶南時因而薦以辯有及其位階間  
酒不祭則薦不祭

凡旅不洗不洗者不祭凡旅起獻皆洗主人酬賓再洗  
非旅也司正洗而不祭特舉也不洗不祭祭尙潔也

既旅士不入 士鄉屬或他鄉觀禮者標入飭雖後大夫  
不過樂備後既旅將徹俎正禮終

徹俎賓介遵者之俎受者以降遂出投從者 賓介有徹  
俎儀不言出投諸公大夫同記意遵者徹儀亦如賓介並  
起遵者從者待事門外如賓介則諸公大夫之出投如遵  
者

主人之俎以東 東東壁饗人將以歸

樂正命奏陔賓出至於階陔作 賓降席乃命奏有大師  
大師命方降云出爲出降兼見出門樂闋奏陔有鐘鼓經  
但稱磬因筮立見位非標縣

若有諸公則大夫於主人之北西面 席尙南面諸公當

在賓東主人北諸公東西面順主人讓諸公不參賓位無諸公大夫賓東南面

主人之贊者西面北上不與無筭爵然后與贊者弟子不與旅西面北上阼階東待命位司正不與獻則贊者不與旅舉觴者以先飲與不在列至無筭爵時或腰解或得賜雖亦與無薦矣

儀禮喪固卷四終

壽櫟廬

第三子吳銑再校

弟子傅守中校勘

儀禮彙固卷五

壽櫟廬叢書之一

名山吳之英典

鄉射禮第五篇 鄉飲不必射州長月吉攷德行黨正索祀  
正齒位教民之方也鄉射必先飲閑禮樂而後論材藝也  
鄉大夫五物詢眾庶三年比賢能州長春秋會民射於州  
序黨正歲時校比以禮屬民皆有射事題鄉州黨皆屬六  
遂遂大夫三歲興毗則縣正鄙師作民從鄉法可知五禮  
屬嘉大戴十一小戴第五劉錄鄭目同第五篇

鄉射之禮 司徒以鄉三物教萬民一六德知仁聖義中和  
二六行孝友睦婣任恤三六藝禮樂射御書數始和布教  
鄉大夫受法退頒鄉吏各教所治攷校唯取射者常藝也

而可以比禮樂觀德行因爲程制特名焉侯國固帥法爾主人戒賓賓出迎再拜主人答再拜乃請賓禮辭許主人再拜賓答再拜主人退賓送再拜稱主人姪鄉大夫州長黨正戒卽請從飲法因素謀不言拜辱士當待校遵國之典無介不戒請射爲校士非專飲賓

乃席賓南面東上眾賓之席繼而西席主人於阼階上西面南面賓位東上統於主人不言戶牖間兼見序射繼繼賓標屬席異於飲

尊於賓席之東兩壺斯禁左玄酒皆加勺篚在其南東肆壺昆吾所作圖器皆加勺示玄酒非虛設

設洗於阼階東南南北以堂深東西當東榮水在洗東篚在

洗西南肆 設洗如飲南肆順賓

縣於洗東北西面 縣判縣備樂射凡樂縣天子宮諸侯軒  
大夫判士植於洗東北不於階間辟射事

乃張侯下綱不及地武不繫左下綱中揜束之 天子大射  
中得爲侯故命射鵠曰侯張相命弟子綱繩耑屬舌末緝  
寸束於植以持侯半步爲武三尺不及也武據士堂三尺  
起度上綱不說右下綱特繫爲鄉主人不繫左左鄉賓賓  
未至中揜左舌右卷束之偏右植

乏參侯道居侯黨之一西五步 參侯謂之正反正爲乏獲  
者所居以蔽矢唱獲參三數侯道三分之黨偏居一假侯  
道五十弓北得十六弓有奇六尺爲步西五步偏西三丈

羹定主人朝服乃速賓賓朝服出迎再拜主人答再拜退賓  
送再拜賓及眾賓遂從之 主人朝服著戒賓同服賓朝服  
著受戒如主人服起鄉飲戒宿皆朝服遂從者眾賓來集  
賓門俟禮畢賓從主人而后從賓

及門主人一相出迎於門外再拜賓答再拜揖眾賓 門兼  
庠門序門相出迎主人辟揖眾賓旅之

主人以賓揖先入賓厭眾賓眾賓皆入門左東面北上 主  
人進延賓故曰以主人不揖眾賓故賓厭門左東面賓位  
北上左賓今文厭皆作揖

賓少進主人以賓三揖皆行及階三讓主人升一等賓升主  
人阼階上當楣北面再拜賓西階上當楣北面答拜 進前

賓少東自別爲位皆行當中庭揖後等階級升一等先賓  
賓升接等拜俱當楹庠序同

主人坐取爵於上篚以降賓降主人阼階前西面坐奠爵興  
辭降賓對主人坐取爵興適洗南面坐奠爵於篚下盥洗賓  
進東北面辭洗主人坐奠爵於篚興對賓反位主人卒洗一  
揖一讓以賓升賓西階上北面拜洗主人阼階上北面奠爵  
遂答拜乃降賓降主人辭降賓對主人卒盥一揖一讓升賓  
升西階上疑立賓反位直西序東面起降位對辭降進對  
復位古者卿大夫士射先行鄉飲酒禮故獻酢酬節約如  
鄉飲法今文主人前西面無阼階古文盥作浣

主人坐取爵實之賓席之前西北面獻賓賓西階上北面拜



主人少退賓進受爵於席前復位主人阼階上拜送爵賓少退薦脯醢賓升席自西方乃設折俎主人阼階東疑立賓坐左執爵右祭脯醢奠爵於薦西興取肺坐絕祭尙左手臍之興加於俎坐挽手執爵遂祭酒興席末坐啐酒降席坐奠爵拜告旨執爵興主人阼階上答拜賓西階上北面坐卒爵興坐奠爵遂拜執爵興主人阼階上答拜 取肺右取肺左執

本坐弗繚絕右絕末取加興重俎古文挽作說。

賓以虛爵降主人降賓西階前東面坐奠爵興辭降主人對賓坐取爵適洗北面坐奠爵于篚下興盥洗主人阼階之東南面辭洗賓坐奠爵於篚興對主人反位賓卒洗揖讓如初升主人拜洗賓答拜興降盥如主人之禮 虛爵賓所卒降。

爲洗奠爵篚下。將先盥。盥洗後主人方進辭洗。校鄉飲辭。在盥前異節。賓奠爵於篚。興對變前奠。篚下位。爲將洗。主人反位。阼階東西南面俟。卒洗。鄉飲則主人復位而後盥。遂取卒洗也。鄉飲賓尊。酢與主人異禮。鄉射不主飲賓。故洗酢略同洗獻。

賓升實爵。主人之席前東南面。酢主人。主人阼階上拜。賓少退。主人進受爵復位。賓西階上拜。送爵薦脯醢。主人升席自北方。乃設折俎祭如賓禮。不告旨。自席前適阼階上北面坐。卒爵興坐奠爵。遂拜執爵興。賓西階上北面答拜。主人坐奠爵於序端。阼階上再拜。崇酒賓西階上答再拜。賓升先升。自席前適阼階上。降席亦由北方。猶奠序端。將獻眾賓。

主人坐取觶於篚以降賓降主人奠觶辭降賓對東面立主人坐取觶洗賓不辭洗卒洗揖讓升賓西階上疑立主人賓觶酬之阼階上北面坐奠觶遂拜執觶興賓西階上北面答拜主人坐祭遂飲卒觶興坐奠觶遂拜執觶興賓西階上北面答拜取觶降將洗酬奠觶阼階前東面立賓退直西序主人降洗賓降辭如獻禮升不拜洗賓西階上立主人實觶賓之席前北面賓西階上拜主人坐奠觶於薦西賓辭坐取觶以興反位主人阼階上拜送賓北面坐奠觶於薦東反位主人揖降賓降東面立於西階西當西序奠觶薦西少退辟拜乃進坐。

主人西南面三拜眾賓眾賓皆答一拜主人揖升坐取爵於

序端降洗升實爵西階上獻眾賓眾賓之長升拜受者三人  
主人拜送坐祭立飲不拜既爵授主人爵降復位眾賓皆不  
拜受爵坐祭立飲每一人獻則薦諸其席眾賓辯有脯醢主  
人以虛爵降奠於篚揖讓升賓厭眾賓升眾賓皆升就席  
無介故續獻眾賓以虛爵降奠正賓畢獻不奠西楹南  
一人洗舉觶於賓升實觶西階上坐奠觶拜執觶興賓席末  
答拜舉觶者坐祭遂飲卒觶興坐奠觶拜執觶興賓答拜降  
洗升實之西階上北面賓拜舉觶者進坐奠觶於薦西賓辭  
坐取以興舉觶者西階上拜送賓反奠於其所舉觶者降  
辭辭奠欲親受坐取不言受質其辭別于飲禮不俟尊者  
大夫入卽舉觶節賓獻表正禮

大夫若有遵者則入門左主人降賓及眾賓皆降復初位主人揖讓以大夫升拜至大夫答拜主人以爵降大夫降主人辭降大夫辭洗如賓禮席於尊東升不拜洗主人實爵席前獻於大夫大夫西階上拜進受爵反位主人大夫之右拜送大夫辭加席主人對不去加席乃薦脯醢大夫升席設折俎祭如賓禮不啗肺不啐酒不告旨西階上卒爵拜主人答拜言若有殊遵者尙大夫稱則斷同儀入待既舉觶入門左仍就賓位主人降將迎賓陪主人眾賓從賓故皆降辟獻酢初位獻畢降位主人揖讓迎於門內以爵降取於上筐不襲賓爵標更尚辭洗如賓禮因無介無諸公故席尊東亦卽賓東不拜洗嫌煩重盥先辭加席爲不委不啗肺

不啐酒不告旨與不拜洗意同皆歷自酌減以別賓今文  
遵爲悞

大夫降洗主人復阼階降辭如初卒洗主人盥揖讓升大夫  
授主人爵於兩楹間復位主人實爵以酢於西階上坐奠爵  
拜大夫答拜坐祭卒爵拜大夫答拜主人坐奠爵於西楹南  
再拜崇酒大夫答拜主人復阼階揖降大夫降立於賓南主  
人揖讓以賓升大夫及眾賓皆升就席 主人盥自潔無所  
忌大夫亦不嫌其以自酌鳴授爵楹間比鄉飲介酢猶奠  
爵西楹南將獻遵者或不止一大夫皆陪禮得相襲猶拜  
崇酒大夫自減辟賓主人不敢有減於賓不酬爲代酌自  
酢殺立賓南踐介位遵者獻酢如大夫因鄉飲無文特見

之。

席工於西階上少東樂正先升北面立於其西工四人二瑟  
瑟先相者皆左何瑟面鼓執越內弦右手相入升自西階北  
面東上工坐相者坐授瑟乃降笙入立於縣中西面乃合樂  
周南關雎葛覃卷耳召南鵲巢采芣采蘋工不興告于樂正  
曰正歌備樂正告于賓乃降西階上亦堂廉立其西豫空  
東面鼓鼓處鄉面起內弦爲側何亦後首東上右瑟縣中  
洗東北西面笙入立如階間位不歌不笙不間而合主於  
射射樂取風故先特合二南。

主人取爵於上筐獻工大師則爲之洗賓降主人辭降工不  
辭洗卒洗升賓爵工不興左瑟一人拜受爵主人阼階上拜

送爵薦肺醢使入相祭工飲不拜既爵授主人爵眾工不拜  
受爵祭飲辯有肺醢不祭 取爵上篚獻工不襲大夫爵大  
師則洗起樂正不洗卒洗以賓升升揖賓就席

不洗遂獻笙於西階上笙一人拜於下盡階不升堂受爵主  
人拜送爵階前坐祭立飲不拜既爵升授主人爵眾笙不拜  
受爵坐祭立飲辯有肺醢不祭主人以爵降奠於篚反升就  
席 不洗因眾工未洗遂獻笙同時入同合樂不殊長猶一  
人拜以異業長白殊拜於下位在下主人以爵降揖卒受  
者降復阼階降反升就席側升側就

主人降席自南方側降作相爲司正司正禮辭許諾主人再  
拜司正答拜主人升就席司正洗解升自西階由楹內適阼



階上北面受命於主人西階上北面請安於賓賓禮辭許司  
正告於主人遂立於楹間以相拜主人阼階上再拜賓西階  
上答拜皆揖就席 由楹內物當楹外據堂言序則可由楹  
外請安於賓受命時文於述命發之與鄉飲錯見成儀今  
文揖爲升。

司正實觶降自西階中庭北面坐奠觶興退少立進坐取觶  
興反坐不祭遂卒觶興坐奠觶拜執觶興洗北面坐奠於其  
所興少退北面立於觶南 中庭卽直階間警衆易司正舉  
觶後卽爲司馬不命相爲司馬而先作司正者飲禮包始  
終直飲名司正直射名司馬糾儀同射畢卽旅不當於彼  
時始出司正舉觶禮古文曰少退立今文無進又奠觶拜

驪作之

未旅三耦俟於堂西南面東上 未旅當旅時目射節未廣五寸爲伐二伐爲耦射法耦二人一上射一下射三耦六人豫比弟子高材者爲之爲道賓也竢竢比堂西西壁南面順賓東上兩耦繼而西

司射適堂西袒決遂取弓於階西兼挾乘矢升自西階階上北面告於賓曰弓矢旣具有司請射賓對曰某不能爲一三子許諾司正適阼階上東北面告於主人曰請射於賓賓許司射主人吏命專射事者適堂西由堂東司射射器先納堂西故就之袒兔衣尙儼利凡袒凶左吉右決鉤弦器飾右擘指遂拾亦謂之臂韞以蔽右袒弓穹也張之隆然

儀禮圖說卷五  
揮所作送矢器矢指也。有所指鄉。夷牟所作屬弓射遠器。乘矢四矢。每發一乘。志四方。取禦亂。挾穀具。猶豫有司。自曰。稱有司。請標已專。射政出命。不由主人。主人在耦。故不能材。藝弱爲代。二三子眾。賓諾。鷹爲許諾。不敢蔽賢。告賓許禮事。當令主人聞之。古文挾皆作接。

司射降自西階。階前西面。命弟子納射器。乃納射器。皆在堂西。賓與大夫之弓。倚於西序。矢在弓下。北括。眾弓倚於堂西。矢在其上。主人之弓。矢在東序東。西面。命示納所來集曰。納射器。射事所用。在猶安。皆在堂西。耦位在倚。袞依於西序。以尊別。括矢。端銜弦口。北括。南鏃。鄉侯。決拾亦在序西。眾弓。大夫耦及眾耦弓。倚堂西。下賓與大夫。矢在上。西括。

各直其弓。異法易識。東序東主位。弓亦倚。矢位如賓與大。夫納敘先堂西後堂東。

司射不釋弓矢。遂以比三耦于堂西。三耦之南北面。命上射曰某御。於子命下射曰子與某子射。不釋弓矢。所親者武。事程其次曰比。稱命。專射政。射從軍政。某下射名御。治子。嘉稱某子。氏若字。稱上射尊之。使聽比辭。則別矣。已耦復比。不敢自差其上下也。古文御作從。

司正爲司馬。司馬命張侯弟子說束。遂繫左下綱。司馬又命獲者倚旌於侯中。獲者由西方坐。取旌倚於侯中。乃退。爲司馬假卿名。司正爲標。由飲行射。不更作。若本職然。使得專命。張全舒之弟子。獲者屬說。舍束中之揜。遂繫前所未。

繫又命因命唱獲志中取事爲名旌所以識獲時未射執以負侯射則執以居之倚侯中誘射不獲由西方旌先納堂西乃退立西方司馬亦退立司射南今文說皆作稅

樂正適西方命弟子贊工遷樂於下弟子相工如初入降自西階阼階下之東南堂前三筭西面北上坐樂正北面立於其南適西方弟子待命於西樂正降時瑟工未降以命贊遷爲降節贊卽相不斥言嫌尊其類筭矢莖據人長短爲制大數三尺樂正北面立別諸工有大師則東上其南笙工南瑟工在北今文云阼階之東

司射猶挾乘矢以命三耦各與其耦讓取弓矢拾三耦皆袒決遂有司左執附右執弦而授弓遂授矢三耦皆執弓搢三

而挾一个 猶挾乘矢將誘射讓取耦各讓上射先代撥曰  
拾先命讓取拾張拾取法袒決遂備射飾有司弟子弓膊  
曰附關弓繩謂之弦左附右弦執順倚受順執遂授矢倚  
時從弓尙未設楅以敘授名拾摺同佩个枚也

司射先立於所設中之西南東面三耦皆進由司射之西立  
於其西南東面北上而俟 中受筭器設中中庭南當楅西  
當西序有常位未設而言先立其西南耦以司射表位司  
射先以中表位實前此已擬位于此始標之猶虛據也西  
南退於中東面兼營堂庭三耦立司射西南又退於司射  
俟俟司射升射先觀射儀

司射東面立於三耦之北摺三而挾一个揖進當階北面揖

及階揖升堂揖序則鉤楹內堂則由楹外當左物北面揖及物揖左足履物不方足還視侯中俯正足不去旌誘射將乘矢執弓不挾右執弦南面揖揖如升射降出於其位南適堂西改取一个挾之遂適階西取扑搢之以反位 再出司射面位嫌升射有變搢三於左挾一个 設絃無耦揖進特揖特進升降如耦示三偶法進示竝行北面揖示鄉階及階揖示揖升升堂揖示竝行至楹序夏學周以名州學序堂無室楹內寬鉤曲由西楹北還當左物行如鉤然序物當棟也堂庠堂庠虞學周以名鄉學黨學同名庠堂有室楹內迫故由外堂物當楣也午畫射位謂之物當左物比下射辟僭北面揖示就物及物揖示履物一從一衡謂之方

左足履物右足比之故不方以爲就物節還轉首外鄉視  
侯中審鵠俯正足乃方爲將射不去旌仍倚爲不獲誘道  
正誘射名標爲帥耦將送將乘矢次發如耦不挾無矢右  
執弦起左執弣南面右還揖示去物如升射物南揖及階  
揖降階揖出位南而后適堂西示反位法改更猶取挾其  
職也前挾皆乘故一个言改扑刑具用挾有過先納階西  
遂取擯誘射畢卽監射政不更端位中西南東面古文序  
爲豫今文適堂西爲適序西

司馬命獲者執旌以負侯獲者適侯執旌負侯而俟 射戎  
事司馬職有命不必請三耦射將唱獲先命負侯去侯乃  
適乏也命由其位還西面執旌負侯爲末射標侯後命



今文侯爲立。

司射還當上耦西面作上耦射司射反位。還左還作進之。  
上耦揖進上射在左並行當階北面揖及階揖上射先升三等下射從之中等上射升堂少左下射升上射揖並行皆當其物北面揖及物揖皆左足履物還視侯中合足而侯。上射在左由北上位並行東行右還當階先升三等既揖特升從之自下等空中階以皆揖皆挾爲辟少左於就右物宜讓下射升由右合足不方射時乃正足侯侯司射命。

司馬適堂西不決遂袒執弓出於司射之南升自西階鉤楹由上射之後西南面立於物間右執簫南揚弓命去侯獲者

執旌許諾聲不絕以至於乏坐東面偃旌興而俟司馬出於  
下射之南還其後降自西階反由司射之南適堂西釋弓襲  
反位立於司射之南 適堂西由其位不決遂無射事猶袒  
與武事執弓不挾矢弓爲畢司正旣爲司馬已去階問位  
言出司射南起從司射爲位鉤楹據序由上射後西而北  
左還東立物間右物下左物上將揚弓故仄立弓末謂之  
簾高舉曰揚命去侯麾而詔之聲不絕至乏欲聞其至爲  
降節偃仆爲偃旌故坐東面偃亦將東面舉興而俟末射  
出下射南還其後東而北右還西爲當物襄事節反由司  
射南退從位東釋弓襲事畢反位起先已擬位立司射南  
司射已進廬表其位

司射進與司馬交於階前相左由堂下西階之東北面視上射命曰無射獲無獵獲上射揖司射退反位相左各直其左司馬西反由內司射東進由外以交階前爲降與進節乏位遠故司馬升命嫌警賓故堂下命視上射目攝之法自尊者立射遲射者緩不及拾濡滯以求獲獵捷獵者速不待拾鹵莽以求獲皆違獲法已命獲則誓之揖諭其意乃射上射既發挾弓矢而后下射射拾發以將乘矢獲者坐而獲舉旌以宮偃旌以商獲而未釋獲卒射皆執弓不挾南面揖揖如升射上射降三等下射少右從之中等竝行上射於左與升射者相左交於階前相揖由司馬之南適堂西釋弓說決拾襲而俟於堂西南面東上三耦卒射亦如之既

發發所挾挾弓矢挾次矢於弓獲每中舉旌唱獲坐而獲  
乏卑得兄矢五聲角徵宮商羽宮爲君濁大舉旌發聲象  
出商爲臣清揚偃旌收聲象入釋置獲筭因獲置筭筭亦  
名獲末釋末設中降從升不變節防疑誤先釋弓而後說  
決拾襲反進時次服器例然猶俟俟再射南面東上前比  
位古文而后作而後

司射去扑倚於西階之西升堂北面告於賓曰三耦卒射賓  
揖司射降摺扑反位去扑將升爲尊賓倚階西將復摺告  
卒射再射賓將與三耦亦道賓也賓揖聞命摺扑反位不  
忘所職

司馬適堂西袒執弓由其位南進與司射交于階前相左升

自西階鉤楹自右物之後立于物間西南面揖弓命取矢獲者執旌許諾聲不絕以旌負侯而侯司馬出於左物之南還其後降自西階自右物後時無上射以右物爲節揖抑揚弓麾去侯抑弓知招負侯命取矢告堂下卒射爲設楅節卽兼見負侯節故獲者許諾弟子不答嫌相錯也執旌獲不離旌戎政以教目也聲不絕欲聞其至侯爲降節出左物南猶還下射

遂適堂前北面立於所設楅之南命弟子設楅乃設楅於中庭南當洗東肆司馬由司射之南退釋弓於堂西襲反位弟子取矢北面坐委于楅北括乃退楅盛矢器立所設南據立位示設位弟子聞取矢命取楅待命故得北面命設中

庭東西節南當洗南北節福左右首言東肆起設者退出  
司馬右北面坐委與設福異位北括備撫退由司馬南  
司馬襲進當福南北面坐左右撫矢而乘之若矢不備則司  
馬又袒執弓如初升命曰取矢不索弟子自西方應曰諾乃  
復求矢加於福襲標進不袒撫个循之左右變委法順上  
下射兩乘足耦故數以乘乘而備則反位不備者雖知三  
耦之數或遺誘射之矢故言若必升命仍前命位爲儀索  
繼意當繼求應通應諾長應聲獲者已負侯弟子當專諾  
司射倚扑於階西升請射於賓如初賓許諾賓主人大夫若  
皆與射則遂告於賓適阼階上告於主人主人與賓爲耦遂  
告於大夫大夫雖衆皆與士爲耦以耦告於大夫曰某御於

子西階上北面作眾賓射。如初稱有司實皆當與言若寬其詞遂告賓辭曰賓與主人耦主人與賓爲耦告主人辭略氏與字不敢以比眾耦辭比之遂告大夫以賓主人與射告士目眾賓其實賓卽士主人先與耦大夫自耦嫌以德藝誇賓皆與士耦助主人教士本意易比辭爲以耦告尊大夫不言尊者若與告如大夫某御於子比以上射辭特告大夫耦當降比綜作眾賓容有不射者。

司射降摺扑由司馬之南適堂西立比眾耦眾賓將與射者皆降由司馬之南適堂西繼三耦而立東上大夫之耦爲上若有東面者則北上賓主人與大夫皆未降司射乃比眾耦辨遂命三耦拾取矢司射反位摺扑比法信於堂下將與

射者降則不與者立筵末三耦發射焉故繼立表位大夫耦上射士耦特降猶以耦大夫尊之爲眾賓耦繼而西也若有東面者謂耦眾南折則北上異面位不異列猶相屬賓主人大夫皆未降不當待事于下言乃待畢降而后比比眾耦大夫耦皆以子與某子射眾耦如三耦之比命三耦綜命之將爲位已設楅當先拾取矢

三耦拾取矢皆袒決遂執弓進立於司馬之西南司射作上耦取矢司射反位拾取矢先爲目執弓不贊因矢在楅立司馬西南猶立司射西南作上耦還西面上耦取則次耦繼

上耦揖進當楅北面揖及楅揖上射東面下射西面上射揖



進坐橫弓卻手自弓下取一个兼諸附順羽且興執弦而左  
還退反位東面揖下射進坐橫弓覆手自弓上取一个興其  
他如上射既拾取乘矢揖皆左還南面揖皆少進當楯南皆  
左還北面楯三挾一个揖皆左還上射于右與進者相左相  
揖反位 揖進上射揖下射竝進當楯北面上射左下射右  
揖北行及楯揖上射右還揖下射左還上射東面下射西  
面各還當楯耑龍首揖進特進坐橫弓附外弦內卻仰卻  
手起左覆執附自弓下爲卻手取一个當四拾兼諸附左  
執之順羽北括且興因順羽因興執弦右爲容左還南折  
而西退西行東面鄉下射揖作之進詳上射拾取儀覆手  
起左卻執附自弓上爲覆手興亦順羽且興如上射據相

對其退則右還東面既拾取乘矢揖進至反位皆如初揖  
取畢當還皆左還各還其左南面標將退揖揖進少進還  
楅皆左還北面回鄉楅揖三挾一个備射儀揖將還皆左  
還仍南面而后西行上射于右順北上進者次耦相左進  
者由南相揖各直耦次反位司馬西南

三耦拾取矢亦如之後者遂亟誘射之矢兼乘矢而取之以  
授有司于西方而后反位亦如者次耦已進後耦如次耦  
後者三耦下射誘射矢司射乘矢亦實楅重始事司射不  
再射故後者因拾畢遂取兼乘矢無與拾因爲大夫耦發  
例有司贊授亦贊受授使藏之西方西堂下云而后起上  
射先反

衆賓未拾取矢皆袒決遂執弓搢三挾一个由堂西進繼三耦之南而立東面北上大夫之耦爲上未拾取未當射矢不在楅執弓堂西讓取如三耦初射儀繼三耦立順西爲位大夫耦爲上如堂西位

司射作射如初一耦揖升如初作射西面作上耦一耦上耦

司馬命去侯獲者許諾司馬降釋弓反位命升命許諾如初降適堂西釋弓則襲起升時袒執弓

司射猶挾一个去扑與司馬交于階前升請釋獲于賓賓許降搢扑西面立於所設中之東北面命釋獲者設中遂視之釋獲者執鹿中一人執筭以從之釋獲者坐設中南當楅西

當西序東面興受筭坐實八筭於中橫委其餘于中西南末興共而俟司射遂進由堂下北面命曰不貫不釋上射揖司射退反位 請釋獲於賓記錄材賢不受命不還告若主人不與賓校勝負然西面南進右還立所設東辟西設示之位北面命改位將遂視鹿中刻鹿形士禮一人弟子坐東面南當楹西當西序據司射西面位爲節東面直鹿腹鹿首鄉堂釋下射於左故興受筭弟子立授坐就中實八筭一耦矢數委置橫委鄉堂爲緇其餘無定筭據司射所比耦數具筭于中西近坐南末本鄉堂北面命仍視上射貫穿侯釋釋筭禮意不以貫賢射法要以貫中不中不當釋已設中則矢之揖諭釋例古文貫作關

釋獲者坐取中之八筭改實八筭於中興執而俟乃射若中則釋獲者坐而釋獲每一個釋一筭上射於右下射於左若有餘筭則反委之又取中之八筭改實八筭於中興執而俟前實八筭本爲中標坐取去標爲上耦筭改實八筭又標爲次耦設興觀矢執執前筭俟俟中乃射以釋獲興爲將矢節坐而釋既釋興每一個謂中一矢上射右下射左依射物之次有餘筭謂不盡中反委委於前橫委位又取釋一耦畢復坐改實又標爲三耦豫

三耦卒射賓主人大夫揖皆由其階降揖主人堂東袒決遂執弓搯三挾一个賓於堂西亦如之皆由其階階下揖升堂揖主人爲下射皆當其物北面揖及物揖乃射卒南面揖皆

由其階階上揖降階揖賓序西主人序東皆釋弓說決拾襲反位升及階揖升堂揖皆就席目三耦卒射爲賓主人大夫降節揖揖降席賓主人降大夫不容在堂故先從降皆由其階嫌主人亦當就西階當階不揖始降不用耦法主人堂東就射器袒袒纁褊決遂弓矢弟子敘贊賓於堂西大夫從適不由司馬南亦如之亦有贊唯肉袒由其階升從降階下揖主人揖賓先升主人爲下射讓賓比時唯告耦故臨射目之皆當其物賓當右主人當左南面揖賓揖左還主人揖右還賓序西主人序東不至堂側變降時位皆釋弓說決拾襲皆有贊反位立階前升主人位在堂賓敵主人不與衆耦齒

大夫袒決遂執弓搢三挾一个由堂西出于司射之西就其耦大夫爲下射揖進耦少退揖如三耦及階耦先升卒射揖如升射耦先降降階耦少退皆釋弓于堂西襲耦遂止於堂西大夫升就席大夫袒袒纁襦決遂弓矢亦贊就其耦始與爲位出司射西由後獵眾耦辟由眾耦前大夫爲下射此時以上射辭于就耦目之使自讓耦少退不敢竝行耦先升大夫讓升從上射例尊之耦先降亦大夫讓降降階又當竝行實大夫遂西故再言耦少退耦止堂西由司馬南反先降位大夫升就席從賓儀不齒士不與耦爲位眾賓繼射釋獲皆如初司射所作唯上耦繼射繼大夫皆如初姦賓主人大夫唯上耦餘進以次

卒射釋獲者遂以所執餘獲升自西階盡階不升堂告于賓  
曰左右卒射降反位坐委餘獲于中西興共而俟 言遂因  
所執餘獲後耦未釋筭盡階令賓聞不升堂賤左右斥射  
物諱言上下告卒射標一終反位東面委中西如前之橫  
起無餘則取於中西以告侯侯司射視筭

司馬袒決執弓升命取矢如初獲者許諾以旌負侯如初司  
馬降釋弓反位弟子委矢如初大夫之矢則兼束之以茅上  
握焉司馬乘矢如初 司馬此時有決起每袒可決決本佩  
飾唯不遂別於射者茅營取潔束尊大夫兼不欲煩拾取  
上羽上握拳爲度爲束法乘矢如初耦多今文上握作尙  
握



司射遂適西階西釋弓去扑襲進由中東立于中南北面視  
筭釋獲者東面於中西坐先數右獲二筭爲純一純以取實  
於左手十純則縮而委之每委異之有餘純則橫於下一筭  
爲奇奇則又縮諸純下興自前適左東面坐兼斂算實于左  
手一純以委十則異之其餘如右獲司射復位 由中東由  
西階前左還立中南北面變視設位視筭監數獲東面于  
中西坐起釋時面位與設時同先數右獲上射當右物據  
釋位亦右之純代耦以嫌名易取實左手右數宜縮委直  
鄉其位每委異十純一委而別橫不鄉其位使餘純與成  
委異列奇特又縮與餘純又異列前中西自前不爲儀適  
左東面坐數左獲兼斂筭實左手將由手委地一純以委

猶之取實十則異亦十純合積而縮其餘謂餘純與奇如  
右獲橫縮間不變法已變位易別記古文縮爲蹇

釋獲者遂進取賢獲執以升自西階盡階不升堂告於賓若  
右勝則曰右賢於左若左勝則曰左賢於右以純數告若有  
奇者亦曰奇若左右鈞則左右皆執一筭以告曰左右鈞降  
復位坐兼斂筭實八筭于中委其餘于中西興共而俟賢  
勝射以觀德勝爲賢告不勝嫌辱賓主告賢獲不勝之筭  
自見必告校一終賓當聞左右據釋位數位名黨以純數  
告該餘純亦曰奇增告奇鈞平左右皆執一筭取鈞平爲  
告具釋獲綜校左右勝負以告明不尙獨賢也兼斂筭收  
合左右爲既告實委如初備復射

司射適堂西命弟子設豐弟子奉豐升設於西楹之西乃降勝者之弟子洗觶升酌南面坐奠於豐上降袒執弓反位

豐似豆所以承尊與爵昔豐侯以酒亡國因刊形著戒亦稱豐侯命設當飲不勝者罰爵不授以豐奠之於西楹西射以校賓勝者弟子上耦洗觶取下筐觶遂洗升酌罰由射不異尊南面坐奠別于獻酢降乃袒取觶升酌不宜袒執弓堂西張弓反位司馬南勝者弟子啟酌事發爲射舉不待命進洗從罰爵常例

司射遂袒執弓挾一个揖扑北面於三耦之南命三耦及眾賓勝者皆袒決遂執張弓不勝者皆襲說決拾卻左手右加弛其上遂以執附司射先反位皆袒決遂執張弓如

射示武命之。使自別。斥名不勝者。已告賢。獲無所諱。皆襲說決拾。示不習。弛解解弦屬弓。因加手。與左並執。故曰遂亦命之。使別於勝者。鈞則否。先反位。待眾耦進爲位。

三耦及眾射者。皆與其耦進。立於射位北。上三耦於命設豐時。已就位。連言者。北上有敘。當表眾耦。皆立射位。著飲爲射爵。

司射作升飲者。如作射。一耦進揖。如升射。及階。勝者先升。升堂。少右。不勝者進。北面坐。取豐上之觶。興少退。立卒解。進坐奠於豐下。興揖。不勝者先降。與升飲者相左。交於階前。相揖出於司馬之南。遂適堂西。釋弓襲而俟。如作射。唯上耦勝者先升。儼爲飲主。少右讓左。就豐北面坐。取若自下受之。

然少退宜自抑立卒觶不祭不拜揖揖勝者先降疑於飲賓交階前勝者中等從降相揖見必以禮出司馬南由射位釋弓皆釋襲勝者特說決拾襲

有執爵者執爵者坐取觶實之反奠於豐上升飲者如初三耦卒飲 罰爵雖由勝者先酌示意不能使敘酌爲煩以當陪升降故有執爵者反奠豐上則序端東面立

賓主人大夫不勝則不執弓執爵者取觶降洗升實之以授於席前受觶以適西階上北面立飲卒觶授執爵者反就席大夫飲則耦不升若大夫之耦不勝則亦執弛弓特升飲眾賓繼飲射爵者辯乃徹豐與觶 目賓主人大夫不勝謂其間有當罰者則同儀不執弓不降堂取觶襲罰觶降洗致

潔尊之授席前不欲其降就罰位受解降席受適西階上  
當豐北面立飲自同罰儀授執爵者受由其手不當奠之  
豐下特言大夫飲爲耦在下立法耦不升嫌自賢爭長於  
大夫不言諸公遵者例如大夫亦執弛弓不敢以大夫耦  
自殊特升飲大夫不降衆賓繼飲如射之次飲豐以校一  
耦之勝負獲者有記志焉示當以德藝自養也卽徹辟射  
徹豐設者升徹以西徹觶執爵者取奠降奠于筐

司馬洗爵升實之以降獻獲者于侯薦脯醢設折俎俎與薦  
皆三祭獲者負侯北面拜受爵司馬西面拜送爵 司馬獻  
獲以專命攝主洗爵取下筐爵再射獻食其功於侯就侯  
東備薦俎重侯皆三祭脯肺各三橫於上爲祭左右个及

中負侯北面仍其位西面拜送非主人不疑正禮古文曰再拜受爵

獲者執爵使人執其薦與俎從之適右个設薦俎獲者南面坐左執爵祭脯醢執爵興取肺坐祭遂祭酒興適左个中皆如之使自使人弟子從之由中而東右个右舌先繫故先祭尊卑所儀神之歸功焉南面坐鄉右个坐祭絕未遂祭酒成一祭適左个爲後繫終於中要成於中

左个之西北三步東面設薦俎獲者薦右東面立飲不拜既爵司馬受爵奠于篚復位西北三步去乏二步辟侯道不祭乏無功於賓主東面設執者從設籩豆俎亦有面薦右東面鄉搢主實先立此表設於卒爵出之立飲卒爵不敢

于侯辟尊不當於乏辟勞

獲者執其薦使人執俎從之辟設於乏南獲者負侯而俟

執薦重禮已授爵則執薦者退使人使設俎者辟退設乏

南遠出入位司馬已於卒射命負侯不容更命故遂負

司射適階西釋弓矢去扑說決拾襲適洗洗爵升實之以降

獻釋獲者于其位少南薦脯醢折俎有祭釋獲者薦右東面

拜受爵司射北面拜送爵釋獲者就其薦坐左執爵祭脯醢

興取肺坐祭遂祭酒興司射之西北面立飲不拜既爵司射

受爵奠於篚釋獲者少西辟薦反位司射適堂西袒決遂取

弓于階西挾一个揖扑以反位司射獻釋獲亦以主命攝

獻釋獲執事後獲者故獻亦後之適階西因倚弓與扑說



決拾襲有贊適洗取爵少南中右有祭有一祭不宜有以  
楅無俎不言設統於薦薦右拜受變位辟功北面拜送順  
其右猶司馬西面拜送位就其薦少北不從中不例侯司  
射之西北面立飲就獻主爲位變獲者位少西辟薦直所  
委筭西南堂西袒決遂贊授不遂請射而反位節獻事

司射去扑倚於階西升請射於賓如初賓許復請賓射禮  
爲賓舉賓當卒之

司射降搢扑由司馬之南適堂西命三耦及眾賓皆袒決遂  
執弓就位司射先反位命皆袒決遂執弓告賓許射就位  
就庭位先反標耦位

三耦及眾賓皆袒決遂執弓各以其耦進反于射位各以

其耦謂眾賓大夫耦特進繼三耦南眾賓繼而南今文以爲與

司射作拾取矢三耦拾取矢如初反位 作拾取矢仍作上耦反位目下耦

賓主人大夫降揖如初主人堂東賓堂西皆袒決遂執弓皆進階前揖及楅揖拾取矢如三耦卒北面楮三挾一个揖退賓堂西主人堂東皆釋弓矢襲及階揖升堂揖就席 賓主人降繼三耦拾取矢大夫降繼賓主人如初初射時降揖皆進直階爲位階前揖主人右還賓左還俱南行及楅揖主人左還立賓右還立卽進退位如三耦賓不兼取乘矢以主人矢不束本欲降與賓敵北面楮挾循耦法揖退俱

還而北卽釋弓矢不爲位於下。襲不言說決拾不必說及階揖少立揖升揖就席賓主客自寬。

大夫袒決遂執弓就其耦揖皆進如三耦耦東面大夫西面大夫進坐說矢東興反位而后耦揖進坐兼取乘矢順羽而興反位揖大夫進坐亦兼取乘矢如其耦北面搢三挾一个揖退耦反位大夫遂適序西釋弓矢襲升卽席袒決遂執弓於堂西就其耦於三耦南如三耦不卑其耦耦東面上射由右大夫西面下射由左進不揖爲說矢東非以次說矢東欲拾取如三耦兼取乘矢豈主人優大夫意盈大夫之尊亦卻手自弓下順羽亦兼附亦兼取如耦不得終拾亦覆手自弓上適序西不竝耦反位由楅北故曰遂釋弓

矢襲不說決拾

眾賓繼拾取矢皆如三耦以反位 眾賓繼取以大夫耦卒  
取爲揖進節

司射猶挾一个以爲作上耦如初一耦揖升如初 猶挾倚  
扑階西取弓矢更挾揖升履物以俟司射既作釋弓矢搯  
扑反位今文云作升射

司馬升命去侯獲者許諾司馬降釋弓反位 司馬升先適  
堂西袒執弓命去侯獲者許諾實如初發更端異節非相  
襲可略沒其文所以張禮意

司射與司馬交於階前去扑襲升請以樂樂於賓賓許諾  
交階前司射北司馬南樂賓請用嘉名其實樂爲射節非

徒樂始射獲再射釋獲終成於樂

司射降摺扑東面命樂正曰請以樂樂於賓賓許司射遂適階閒堂下北面命曰不鼓不釋上射揖司射退反位 摺扑命慢樂事亦有捷例東面鄉縣命以賓許使知奏爲節射和樂以鼓不鼓不合鼓節釋舍矢豫誓之爲用樂行矢之節

樂正東面命大師曰奏騶虞間若一大師不興許諾樂正退反位 樂正辨樂章大師綜樂事故定名審節以命大師射樂天子以騶虞諸侯以貍首大夫以采蘋士以采蘋奏合奏騶虞鄉射天子不與許上取間猶終間若一五終如一疏數適也疏數適則射者緩急節矣

乃奏騶虞以射三耦卒射賓主人大夫眾賓繼射釋獲如初  
卒射降 卒射賓主人升就席大夫特升就席眾賓位堂西  
以降而後升卒射必降綜目之。

釋獲者執餘筭升告左右卒射如初 升告又一成既告反  
位今文曰告於賓。

司馬升命取矢獲者許諾司馬降釋弓反位弟子委矢司馬  
乘之皆如初司射釋弓視筭如初釋獲者以賢獲與鈞告如  
初降復位 命取矢則獲者負侯復位備射因未退中今文  
筭爲數。

司射命設豐設豐實解如初遂命勝者執張弓不勝者執弛  
弓升飲如初 言遂命以未袒執弓變射時節其實命設豐

在堂西命升飲在三耦南因襲不因位若賓主人大夫不勝不執弓授爵如初大夫飲耦不升耦不勝特升飲皆如初辨徹豐與饌

司射遂袒決遂左執弓右執一个兼諸弦面鏃適堂西以命拾取矢如初司射反位遂續事詞因適堂西先適階西故遂弓謂附兼諸弦右執弦面鏃下括不挾變正射法爲三耦拾取法

三耦及賓主人大夫眾賓皆袒決遂拾取矢如初矢不挾兼諸弦附以退不反位遂授有司于堂西辨拾取矢揖皆升就席三耦帥射事故以及賓主人大夫眾賓如初慎終猶始執德之常矢不挾禮有終兼諸弦附上射兼弦如司射下

射兼附皆面鏃謂左還北面時亦不摺反堂西授有司卽爲位故不反射位揖謂大夫耦辯拾取先取者敘待堂西主人揖贊升大夫厭眾賓故皆升就席

司射乃適堂西釋弓去扑說決拾襲反位適堂西就弟子不於階西待畢升故言乃盡去射物武事畢猶反射位中未退

司馬命弟子說侯之左下綱而釋之命獲者以旌退命弟子退楅司馬命張侯仍命說說左下綱命張時所繫釋之不揜束別於未射時候不徹禮所主獲者亦司馬所命退時仍命之以旌退終所事楅由司馬命設故亦命退命獲者不升則皆遂命



司射命釋獲者退中與筭而俟 中與筭司射所命設仍由  
命退俟俟堂西若不敢必賓主意然既命司射退立堂東  
司馬反爲司正退復解南而立 初射時司正爲司馬將復  
燕故反爲以退中與筭畢爲反節解猶未徹標射在燕中  
退立解南反爲之證

樂正命弟子贊工卽位弟子相工如其降也升自西階反坐  
命贊卽位將舉無筭樂降時如入則再升如降反坐相  
者坐授瑟降起樂正不升

賓北面坐取俎西之解興阼階上北面酬主人主人降席立  
于賓東賓坐奠解拜執解興主人答拜賓不祭卒解不拜不  
洗賓之進東南面主人阼階上北面拜賓少退主人進受解

賓主人之西北面拜送賓揖就席 俎西觶獻眾賓後一人  
舉於賓者未旅而射故此時行酬卒觶立卒東南面比酢  
授

主人以觶適西階上酬大夫大夫降席立於主人之西如賓  
酬主人之禮主人揖就席 酬大夫爲無介大夫若眾則酬  
長大夫以次行酬

若無大夫則長受酬亦如之司正升自西階相旅作受酬者  
曰某酬某子受酬者降席司正退立於西序端東面 有大  
夫則司正待大夫畢酬而后升相旅所作唯賓長餘依席  
次以降受酬者降席自右受觶退立西序端東面俟卒酬  
眾受酬者拜興飲皆如賓酬主人之禮辯遂酬在下者皆升

受酬於西階上卒受者以觶降奠于篚司正降復位 眾受  
酬者受自左辯堂上眾賓射與不射者皆與旅言遂略之  
在下者謂三耦及獲者釋獲者諸弟子司正皆相之降糾  
酬儀畢位觶南

使二人舉觶于賓與大夫舉觶者皆洗觶升實之西階上北  
面皆坐奠觶拜執觶興賓與大夫皆席末答拜舉觶者皆坐  
祭遂飲卒觶興坐奠觶拜執觶興賓與大夫皆答拜舉觶者  
逆降洗升實觶皆立于西階上北面東上賓與大夫拜舉觶  
者皆進坐奠于薦右賓與大夫辭坐受觶以興舉觶者退反  
位皆拜送乃降賓與大夫坐反奠于其所興 舉觶賓與大  
夫爲無介皆席末答拜起于奠觶時降席立皆答拜亦于

席末賓與大夫拜將升取觶皆奠薦右席皆南面皆于西  
若有諸公則大夫之觶北奠本坐取言受成受意古文反  
奠作反坐。

若無大夫則唯賓 唯賓一人舉觶若二人則一奠賓二之  
主人

司正升自西階阼階上受命於主人適西階上北面請坐於  
賓賓辭以俎反命於主人主人曰請徹俎賓許司正降自西  
階階前命弟子俟徹俎司正升立于序端賓降席北面主人  
降席自南方阼階上北面大夫降席席東南面賓取俎還授  
司正司正以降自西階賓從之降遂立於階西東面司正以  
俎出授從者主人取俎還授弟子弟子受俎降自西階以東

主人降自阼階西面立大夫取俎還授弟子弟子以降自西階遂出授從者大夫從之降立於賓南眾賓皆降立於大夫之南少退北上主人以賓揖讓說屢乃升大夫及眾賓皆說屢升坐 大夫降席席東南面據無諸公席在賓東猶鄉飲尊者降位主人不俟大夫而取俎尊敬於賓主人西面立不言階東不避升降大夫立賓南陪賓少退北上眾賓不敢直屬尊大夫將說屢揖既說讓升故曰揖讓說屢乃升主人以賓升不俟大夫猶之降大夫及眾賓揖說厭升獲與釋獲之俎自執以東。

乃羞無筭爵 羞以佐爵微俎始羞故言乃不聯言無筭樂欲使二人舉觶相屬

使二人舉觶賓與大夫不興取奠觶飲卒觶不拜執觶者受  
觶遂實之賓觶以之主人大夫之觶長受而錯皆不拜使  
二人得交酬舉觶執爵者酬辭復舉以終燕謂之無筭不  
先飲將與旅不興以無筭略飲坐飲卒觶不拜略拜節嫌  
坐卒爵有拜標之受觶不言坐立受遂實不洗賓觶之主  
人比賓酬主人長受大夫觶猶大夫酬賓長錯參主人卒  
觶以之次賓長卒觶三賓受眾賓依次兩觶迭舉故錯  
卒受者興以旅在下者于西階上長受酬酬者不拜乃飲卒  
觶以實之受酬者不拜受辯旅皆不拜執觶者皆與旅卒受  
者以虛觶降奠于筐執觶者洗升實觶反奠于賓與大夫無  
筭樂卒受者興將適西階上以弟子無位于上既興則舉

解者降一人以先受虛解降奠一人從皆適西堂俟長上耦之上射酬者不拜從略嫌當殊長以實之酬者自實執觶者皆與旅則弟子無不與標無筭爵旅執觶者始之終之卒受者舉大夫解者降奠于筐禮一終也洗託始新之反奠賓與大夫發再旅耑終則復始若再舉而賓與大夫不取奠乃不旅至此始言無筭樂起每舉觶皆有樂古文長受酬下云受酬者

賓興樂正命奏陔賓降及階陔作賓出眾賓皆出主人送於門外再拜命仍命大師及階作出大門而闕眾賓從賓出不俟大夫大夫繼出主人拜送

明日賓朝服以拜賜于門外主人不見如賓服遂從之拜辱

於門外乃退。朝服射日服。標與鄉飲同服。門外庠序門外以主人將息。司正客未歸。不見。無賜焉。遂從躡其後。乃退。賓亦不見。主人自退。

主人釋服。乃息。司正無介。不殺。使人速迎于門外。不拜。入。升。不拜。至。不拜。洗。薦脯醢。無俎。賓酢。主人主人不崇酒。不拜。眾賓既獻。眾賓一人舉觶。遂無筭爵。無司正。賓不與徵。唯所欲。以告于鄉先生。君子可也。羞唯所有。鄉樂唯欲。無介。賓所無。使人速降于賓。不拜。揖。先入。不拜。至。非初至。不拜。洗。不敢儼。賓起。辭洗。不崇酒。嫌誚。酢之。僭。猶有眾賓。眾賓可與。不拜。眾賓旅揖之。一人舉觶。奠。司正卒爵。授舉者。以之。主人主人卒爵。受實以之。賓長故曰。遂無筭爵。無司正。辟所



客不再息古文與皆作豫

記大夫與則公士爲賓使能不宿戒 謂他鄉大夫以事  
至主人爲舉鄉射公士在官少尊非正校興賓鄉士有厭  
使能起公士有材藝弱者

其牲狗也烹於堂東北尊綌冪賓至徹之蒲筵緇布純西  
序之席北上 有西序席或賓多廣其位北上欲皆屬

獻用爵其他用觶以爵拜者不徒作薦脯用邊五臟祭半  
臟橫于上醢以豆出白東房臟長尺二寸 竹豆謂之邊

宜燥物臟挺五臟制數半臟六寸祭尙精橫上正脯縮木  
豆謂之豆宜濕物臟長尺二寸起邊長豆如邊古文臟爲  
臠

俎由東壁白西階升賓俎脊脅肩肺主人俎脊脅臂肺肺  
皆離皆右體也進腍由東壁烹所在不言大夫俎脊脅  
肫脇肺比鄉飲介俎

凡舉爵三作而不徒爵雖無介獻大夫取爵上篚仍奠  
西楹南兩爵亦通得三作

凡奠者于左將舉者于右眾賓之長一人辭洗如賓禮若  
有諸公則如賓禮大夫如介禮無諸公則大夫如賓禮  
無諸公無所屈則俎有如賓法

樂作大夫不入嫌失樂賓意違獻節

樂正與立者齒大樂正中士小樂正下士與立鼓鍾磬  
鐃笙工皆士故齒獻薦從齒

三笙一和而成聲 大笙謂之巢小者謂之和三笙皆巢  
一和叶之成聲合律凡笙四人

獻工與笙取爵于上簠既獻奠于下簠其笙則獻諸西階  
上 笙襲工爵今文無與笙

立者東面北上 該賓入立降立及射耦立位

司正既舉觶而薦諸其位三耦者使弟子司射前戒之

主人豫使釋三耦所由名前戒賓未至時

司射之弓矢與扑倚于西階之西 弓矢從扑別于堂西  
弓矢皆先納如張侯

司射既袒決遂而升司馬階前命張侯遂命獲者倚旌  
謂司射初請射司正甫爲司馬階前西南面命張侯爲司

馬之證遂命不升今文無獲者

凡侯天子熊侯白質諸侯麋侯赤質大夫布侯畫以虎豹  
士布侯畫以鹿豕凡畫者丹質梓人張皮侯而棲鵠則  
春以功張五采之侯則遠國屬張獸侯則王以息燕然則  
息燕所張皆獸侯熊獸似豕山居冬蟄熊侯或織或繡象  
熊首于中質氏白質熊首外白麋鹿屬麋侯織繡麋首赤  
質麋首外赤布侯全布筆寫形曰畫不織繡虎山獸之君  
豹似虎圖文畫虎豹或虎或豹鹿大麋豕羝竭其尾畫鹿  
豕或鹿或豕丹巴越赤石丹質布染經質有定畫辟色白  
質赤質之帛織繡辟色可知

射自楹間物長如筈其間容弓距隨長武序則物當棟堂

則物當楣 自楹間節東西通堂序筭矢幹幹三尺率其間物相去容弓西南衰鄉弓率六尺司馬當於其間揚弓揖弓耦亦得相辟也足順面謂之距順脅謂之隨武半步謂午畫衡度如長以爲合足方足節中梁曰棟爲序深檐棟曰楣爲堂淺制所當因地爲位

命負侯者由其位 司馬初命再命負侯皆不升由其位由前司正位少進西南面竢司射作上耦射反位乃有位凡適堂西皆出入於司馬之南唯賓與大夫降階遂西取弓矢 凡矧司射以下出入司馬南法取齊一言唯言遂以尊別不言主人禮事統於西東方不以執事表位

旌各以其物無物則以白羽與朱羽糒枉長三勿以鴻脰

韜上二尋 旌猶旗軍職大名司常掌九旗物名常旂旗  
物旗旛旐旄旌皆畫其象官府象事州里象名家象號析  
羽爲旌游車所載襍帛爲物大夫士建物各以各象鄉州  
事名無物或有役吏以出襍間不析在旌物間杠樹旌木  
人伸臂八尺謂之仞以似鴻鵠爲名脰項鴻脰長喻上杠  
韜衣之圍束上杠於依旌宜尋亦兩臂度卽韜度起羽度  
餘一切爲執取翻制通其變示不當假他鄉他州之異事  
異名今文襍爲緇韜爲翻

凡挾矢於二指之間橫之二指間大指次指間橫據弓  
爲橫

司射在司馬之北 射事以司射表位司馬在南

司馬無事不執弓 起司射常執之

始射獲而未釋獲復釋獲復用樂行之 釋射節三漸加  
以爲文

上射于右 謂履物西直右據耦鄉外下射可知

楅長如筈博三寸厚寸有半龍首其中蛇交韋當楅髮橫  
而拳之南面坐而奠之南北當洗 長楅長博寬厚寸有  
半四周之度龍鱗蟲之長龍首刻兩端拾取各當首不敢  
以尾瀆下射中刻蛇似虫而長蛇交刻龍身兩旁來恰如  
蛇宛延相糾韋韋當氏韋爲當宜承鏃再言楅曰設角  
奮曰髮謂兩龍首橫謂設者身當蛇交爪支曰拳謂兩手  
持髮握固坐奠于拳宜南面與委矢者對卽爲辟司馬乘

矢位。

射者有過則撻之。有過不用命撻。揆其背釋司射所以搢仆。

眾賓不與射者不降。因經有若皆與射文爲不與立例。不降立筵末降無位古文與爲豫。

取誘射之矢者既拾取矢而后兼誘射之乘矢而取之。嫌可先取既拾取矢不妨正禮。

賓主人射則司射擯升降卒射卽席而反位卒事。擯升降司射進立西階東北面爲至階有緩急卽席賓主人已升揖反位司馬北卒事卒擯不以司馬擯嫌仍燕職大夫降從賓特升不擯。



鹿中髹前足跪鑿背容八筭釋獲者奉之先首 髹謂刻  
鹿首前足跪示馴負筭奉亦橫拳先首首鄉堂釋下射於  
左坐設東面

大夫降立於堂西以俟射 立堂西不就耦起唯拾取矢  
出爲位俟射俟賓主人

大夫與士射袒薰襦耦少退於物 薰纁染羽三入色短  
複謂之襦袒上衣見薰襦起耦肉袒少退于物南而北明  
讓

司射釋弓矢視筭與獻釋獲者釋弓矢 視筭獻釋獲非  
武事去武備起他皆不釋

禮射不主皮主皮之射者勝者又射不勝者降 禮射觀

德主志皮侯主皮貫革標鄉射爲禮侯畫獸非皮五物有主皮者兼平日習射詢之張皮侯而棲鵠則春以功尚武功則主皮又射再將乘矢試其習非幸中降不敢與耦兼見武射法

主人亦飲於西階上西階上豐位嫌主人可就阼階飲故言亦

獲者之俎折脊脅肺臠前臂下節謂之臠肺亦節解而制故統稱折

東方謂之右个侯面鄉堂東方爲右左个當西與堂上物鄉南相反

釋獲者之俎折脊脅肺皆有祭去臠減於獲者皆猶亦

有祭一祭

大夫說矢束坐說之 嫌可立說敬爲禮本

歌騶虞若采蘋皆五終射無筭 采蘋大夫本節故若起  
亦可采蘋皆五終拾發乘矢猶聽一終而降射無筭歌無  
筭

古者于旅也語凡旅不洗不洗者不祭既旅士不入 稱  
古者數典已舊語稱先道古以道藝相勸厲謂已旅者于  
旅語先時不敢語凡旅不洗發耑舉觶者不在列士入雖  
後大夫猶限于旅前以獻士當洗

大夫後出主人送于門外再拜 後出後眾賓入在獻後  
出不敢先嫌不送著其送其實主人待送不更入起眾賓

同送賓之拜

鄉侯上个五尋中十尺侯道五十弓弓二寸以爲侯中倍  
中以爲躬倍躬以爲左右舌下舌半上舌 鄉侯干侯橫  
持侯上下曰个亦曰舌上个上舌八尺曰尋中侯中梓人  
爲侯廣與崇方十尺從廣丈有裏自堂至侯量爲侯道五  
十弓據經步弓二寸弓取二寸以爲侯中標十尺所因重  
加謂之倍直持侯邊謂之躬加中數爲躬數則二丈蓋大  
夫士侯皆用布幅二尺二寸幅布複之各紕寸以純邊長  
丈外內二丈倍躬四丈左右舌俱目上舌亦取幅布複紕  
以爲緣直中丈直躬二尺左右餘四尺共二丈合複得四  
丈故曰上个五尋約去侯尺維植三尺則持侯堅爲上綱

不說故下舌制如上亦直中丈直躬二尺左右餘二尺得丈六尺竝複數三丈二尺則去侯尺維植尺少短宜說繫綜大數故曰半上舌持侯不宜禪知合複算所謂上兩個與身三下兩個半之亦此誼也今文弓爲肱

箭籌八十長尺有握握素箭小竹籌筭八十十耦數布指知寸一握四指尺有握尺四寸素帛謂約握飾所執約四寸

楚扑長如筈刊本尺楚叢生木一名荆楚扑以楚爲扑刊刪刊本尺宜執

君射則爲下射上射退于物一筈既發則答君而侯鄉射有君或以事至命禮射據侯國言士爲賓君耦賓主人

耦介爲下射。有主道。退物一筈。北辟爲恭答。回鄉俟俟君發。今文爲下無射。

君樂作而后就物。君袒朱襦以射。小臣以巾執矢以授。凡射耦就物而后作樂。君樂作就物。緩其節。上射先物。北東面俟。君袒不降。小臣贊朱正赤色。深于薰。上射肉袒。小臣詔相小法儀。夏官屬。君將射。小臣降取決拾弓矢。俟堂東上射升。乃側升贊。設決拾授弓。遂授矢。以巾執矢。還手澤。授稍屬。君不自搢。

若飲君如燕則夾爵。謂君若不勝。飲射爵。燕燕禮夾爵。先自飲。飲君後。復自飲。君爵在中。故曰夾。略同燕時勝爵。故曰如燕。

君國中射則皮樹中以翻旌獲白羽與朱羽糒于郊則閭  
中以旌獲于竟則虎中龍壇 國中射小學中射皮樹虞  
獲屬迅頭翻羽翳因名旌于郊大學中射閭北唐戎獸似  
獬旌析羽不糒于竟鄉遂庠序中射通帛曰壇紩壇以龍  
曰龍壇若賓初登賢書君爲舉射則宰爲主人公與賓耦  
賓射干侯君射麋侯虎中在鹿中北今文皮樹作緜豎糒  
爲緜古文無以

大夫兕中各以其物獲士鹿中翬旌以獲 兕似牛青色  
各以物獲卿以壇大夫以物翻旌與君國中射獲旌同用  
于鄉故不辟古文翻旌無以獲

唯君有射于國中其餘否 其餘孤卿以下小學之士皆

世適不射于學就肄郊竟古文有作又今文無其餘否  
君在大夫射則肉袒 大夫與士射袒薰襦君在肉袒不  
敢自異于尊者之前士固肉袒今文大夫下無射

弟 子傳守中校勘

壽櫟廬第二子吳 銑再校



儀禮通考卷五終